

24 MAI

**SLUJBA
ADUCERII
MOAȘTELOR
SF. CUVIOASE
EUFROSINA
DE LA POLOȚK**

POLOȚK, 2008



Месяца мая, день 24

Служба

**на пренесение честных мощей
преподобных матере нашея
Евфросинии, игуменнии Полотския,
от града Киева во град Полотск**

На велицей вечерни

На Господи, воззвах: стихиры, глас 5.

Киими похвальными песньми ныне ублажим тя в честном празднице твоего пренесения, преподобная Евфросиние? Духовно празднующе просим: молися победы православному воинству нашему на враги даровати, тебе бо теплую ко Владыце молитвенницу стяжахом, подающую миру велию милость.

Радуйся, земле Полотская, красуйся и ликуй, обитель Спасова: днесь бо светило великое паки возсия тебе – многоцелебныя мощи всечестныя и святыя Евфросинии, просвещающия страну нашу богодарованными чудесы. Сии яко источник неисчерпаемый показашася, яко струи точат исцеления с верою приходящим к ним: дарует бо преподобная здравие неоскудно

болящим, во гресех великое врачевание и Христа молит даровати душам нашим велию милость.

Радуйся, преподобная мати Евфросиние, ты бо, ангельское житие на земли поживши, пощением и воздержанием плоть духови покорила еси, и свет Полотстей земли явилася еси. Темже украсилася еси венцем нетления, блаженная, и Спасу Жениху твоему обитель себе соделала еси, и дарования благодатнаго от Него сподобилася еси: помогати в скорбех и обстояниих приходящим с верою и любовью к мощем твоим и празднующим честное их пренесение. Моли Спаса даровати душам нашим мир и велию милость.

Приидите, людие Полотския страны, молебными песньми нашея заступницы и покровительницы честное пренесение радостно восхвалим: сия бо скорбящая божественне утешает, обидимыя избавляет, сия милостынею от трудов своих нищия снабди и того ради прият стократное воздаяние. К ней убо ныне возопиим: молися, преподобная Евфросиние, ко Спасу всех умирить и утвердить в православии землю нашу и спасти души наша.

Слава, глас тойже:

Радуйся и веселися, обитель Спасова, светло торжествуй, земле Полотская, ликуйте, людие: днесь созывает нас преподобныя матере нашея пресветлое торжество. Приидите убо, светло празднуим пришествие многоцелебных мощей ея, глаголюще: радуйся, Евфросиние, невесто Христова всечестная; радуйся, богомудрая наставнице святых дев; радуйся, скорбящим душею божественное утешение, и обидимым защитнице, и всем в православии чтущим тя тихое пристанище. Темже, окрест стояще всечестных мощей твоих, молебнo к тебе руке простираем и умиленно просим утвердити ны в вере и благочестии, миру мир даровати и душам нашим велию милость.

И ныне, Богородичен:

В Чермнем мори Неискусобрачныя Невесты образ написася иногда: тамо Моисей, разделитель воды, zde же Гавриил, служитель чудесе; тогда глубину шествова немокренно Израиль, ныне же Христа роди безсеменно Дева; море по прошествии Израилеве пребысть непроходно, Непорочная по рождестве Еммануилеве пребысть нетленна. Сый и прежде Сый, явлейся яко Человек, Боже, помилуй нас.

Вход. Прокимен дне. И чтения.

Премудрости Соломоновы чтение (главы 5 и 6):

Праведницы во веки живут, и в Господе мзда их, и попечение их у Вышняго. Сего ради примут Царствие благолепия и венец доброты от руки Господни, зане десницею покрывает я и мышцею защитит их. Приимет всеоружие рвение Свое и вооружит тварь в месть врагом. Облечется в броня правды и возложит шлем, суд нелицемерен. Приимет щит непобедимый, преподобие. Поострит же напрасный гнев во оружие; споборет же с ним мир на безумныя. Пойдут праволучныя стрелы молниины и, яко от благокругла лука облаков, на намерение полетят. И от каменометныя ярости исполнь падут грады, вознегодует на них вода морская, реки же потопят я нагло. Сопротив станет им дух силы, и, яко вихор, развеет их и опустошит всю землю беззаконие, и злодейство превратит престолы сильных. Слышите убо, царие, и разумеите, навыйкните, судии концев земли. Внушите, держащии множества и гордящиися о народах языков, яко дана есть от Господа держава вам и сила от Вышняго.

Премудрости Соломоновы чтение (глава 3):

Праведных души в руке Божией, и не прикоснется их мука. Непщевани быша во очесех безумных умерети, и вменися озлобление исход их. И еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут. Судят языком и обладают людьми, и воцарится Господь в них во веки. Надеющиися Нань разумеют истину и вернии в любви пребудут Ему. Яко благодать и милость в преподобных Его и посещение во избранных Его.

Премудрости Соломоновы чтение (глава 4):

Праведник аще постигнет скончаться, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости житие нескверное. Благоугоден Богови быв, возлюблен бысть, и живой посреде грешник преставлен бысть. Восхищен бысть, да не злоба изменит

разума его, или лесть прельстит душу его. Рачение бо злобы помрачает добрая, и парение похоти пременяет ум незлобив. Скончався в мале, исполни лета долга. Угодна бо бе Господеви душа его, сего ради потщася от среды лукавствия. Людие же видевшие и не разумевше, ниже положше в помышлении таковое. Яко благодать и милость в преподобных Его, и посещение во избранных Его.

На литии стихиры, глас 1:

По завету твоему не оставила еси удела твоего, мати наша Евфросиние, но возвратилася еси во град Полотск, во обитель твою, в нейже прежде Духом Святым освятившись, была еси игумения и пасла еси духовная чада твоя многотрудно, просияла бо еси дела благими, и мнози ко Христу привела еси, и Крест Честный твоей обители завещала еси. Отонудуже востекла еси во град Иерусалим видети и лобызати Гроб Спаса Христа, и тамо Господь прият душу твою, водворив в Горний Иерусалим, святое же тело твое, чудно сподобив нетления, пресели во град Киев, идеже и упокои тя на многая лета со святыми Русския земли. Ныне же град и обитель твоя, паки видевшие тя в себе, возвеселишася о возвращении твоем и, яко дар многоценен, приемше мощи твоя, вопиют ко Спасу:

молитвами, Христе, преподобныя матере Евфросинии, даруй людям Твоим в скорбех утешение и душам нашим велию и богатую МИЛОСТЬ.

Глас 4:

Приидите, вернии, хвалами сошедшеся, ныне составим торжество в честнем празднице чуднаго пренесения мощей блаженныя Евфросинии и, духовно радуящеся, к ней возопиим: умоли Христа Спаса православному воинству нашему победы на враги даровати, тебе бо молитвенницу ко Владыце теплу стяжахом, подающую нам велию милость.

Слава, глас 8:

Благоухает, сияющи, рака мощей твоих, преподобная Евфросиние, всем верным исцеление душ и телес дарующи. Темже ты молим благодарванное тебе стадо в мире соблюсти, православие утвердити, люди укрепити, да вси тебе, яко заступление наше и молитвенницу к Богу, непрестанно величаем.

И ныне, Богородичен, глас тойже:

Владычице, прими молитвы раб Твоих и избави нас от всякия нужды и печали.

На стиховне стихирьы, глас 8:

Приидите, людие, днесь честное преподобныя матере нашея торжество благочестно песньми почтим: та бо воистину Святаго Духа осияние от юности сподобися прияти, воздержанием тело свое утончивши, и душевною чистотою света Трисолнечнаго заря явися, и ныне молится о чтущих любовию память ея.

Стих: Честна пред Господем смерть преподобных Его.

О преславное чудо! Божиим мановением нетленное тело твое, преподобная мати, из Киева паки во удел твой пришед, водворися почивати ту, по завету твоему, во веки. Вернии же людие, сретше тя, радостию и любовию зывают: молитвами преподобныя, Христе Боже, спаси души наша, яко Милосерд.

Стих: Блажен муж, бояйся Господа, в заповедех Его восхощет зело.

Возсия днесь пресветлое торжество, мати богомудрая Евфросиние: ты бо от юности Богу прилепилася еси и Того стопам последовала еси, мирскую же славу оставила еси и ныне на небесех царствуеши. Мы же, покланяющесе мощем твоим, верно от души Христа

славословим, давшего нам тебе, теплую молитвенницу к Богу, к Немуже молися о нас, чтущих и светло празднующих твое пренесение, спаситися душам нашим.

Слава, глас тойже:

Яко светозарная звезда, во обители Спаса возсияла еси учением словес твоих, Евфросиние приснопамятная. Ты бо премудрая наставница показала еси, образ являющи словом, житием, кротостию и любовью стаду твоему, научающи князи и вся люди вражду и междоусобия отметати, в любви же, мире и соединении нераздельнем пребывати. По отшествии же твоем на место, идеже стоясте нозе Господни, и отгуду в Горний Иерусалим не восхотела еси, мати наша, град и обитель твою оставить, якоже прорекла еси, но духом молитвы и любви присно с нами пребывающи, ныне и мощми твоими нетленными из града Киева возвратилася еси, да ублажаем тя со псалмы и песньми, и святое, и всечестное пренесение празднуем, чтуще память твою.

И ныне, Богородичен:

Безневестная Дево, Яже Бога неизреченно зачещи плотию, Мати Бога Вышняго, Твоих рабов мольбы приими, Всенепорочная, всем

подаючи очищение прегрешений, ныне наша моления приемлющи, моли спастися всем нам.

По Ныне отпускаеши: тропарь, глас 3.

Веселися, земле Полотская, красуйся и ликуй, обитель Спасова, се бо Господь исполни желание сердца вашего: духовная мати ваша и предстательница, Евфросиния богомудрая, яко птица, возлете от града Киева и, яко горлица, обрете гнездо свое во обители древняго удела своего, идеже собирает птенцы своя под криле свои, сохранить и утвердити я в правоверии, пришествием многоцелебных мощей своих просветити омраченныя, собрати расточенныя, разогнати тьму искушений и бед от вопиющих верно: спасай нас молитвами твоими, яко предстательница наша, преподобная мати Евфросиние.

На утрени

**На Бог Господь: тропарь пренесения,
дважды.**

**Слава, и ныне, праздника, или Богородичен,
глас 3:**

Тя, ходатайствовавшую спасение рода нашего, воспеваем, Богородице Дево: плотию бо, от Тебе

восприятю, Сын Твой и Бог наш, Крестом восприим страсть, избави нас от тли, яко Человеколюбец.

По 1-м стихословии седален, глас 1:

Пресветлое пренесение мощей твоих днесь торжествующе, молим тя, преподобная Евфросиние: Спаса и Господа моли прилежно всем подати прегрешений прощение.

Слава, и ныне, Богородичен:

Упование христиан, Пресвятая Дево, Егоже родила еси Бога, паче ума и слова, непрестанно моли с Вышними Силами подати оставление грехов и исправление жития верою и любовию присно Тя славящим.

По 2-м стихословии седален, глас 4:

Житие во Иерусалиме благочестно скончавши, вместилище благодати Духа Святаго явилася еси в нетлении честнаго тела твоего, просвещаючи к тебе верою притекаюция, преподобная, темже моли Владыку и Господа просветити души наша, радостию сретающих тя, Евфросиние, богомудрая мати наша.

Слава, и ныне, Богородичен:

Обновила еси, Чистая, силою из Тебе рождшагося Господа истлевшее во страстях мертвенное существо земнородных и воздвигла еси вся от смерти к жизни нетления. Темже Тя блажим вси, Дево Препрославленная, якоже прорекла еси.

По полиелеи седален, глас 8:

Прославляет, мати, тебе ныне земля Полотская, юже от еретических обстояний и скорбей избавляеши, богоблаженная Евфросиние, ангелов собеседница и православия утверждение явившись. Темже со апостолы и преподобными ликующи, помощница являешия обидимым, плачущих утешение, заблуждших вразумление и монашествующих наставница. И нас, преподобная мати, молитвами твоими избави от бед и молися Христу Богу, да оставление грехов подаст верою и любовию чтущим святую память твою.

Слава, и ныне, Богородичен, глас тойже:

Безвестная Чистая Богородице Дево, Единая верных Предстательнице и Покрове, от бед и скорбей и лютых обстояний всех избави, на Тя

упование, Отроковице, имущих, и души наша спаси молитвами Твоими.

Степенна, 1-й антифон 4-го гласа. Прокимен, глас 4: Честна пред Господем смерть преподобных Его. **Стих:** Что воздам Господеву о всех, яже воздаде ми? Всякое дыхание: **Евангелие от Матфея, зачало 43.**

По 50-м псалме стихира, глас 6:

Приидите, вси людие, хвалу принесем преподобней, вопиюще: радуйся, Полотския земли похвало; радуйся, отрасль славная Владимира равноапостольнаго; радуйся, именитых родителей чадо богоизбранное; радуйся, путь иноческаго жития избравшая; радуйся, молящаяся Христу, о еже сохранить страну нашу и подати верным победы на враги и безбожныя супостаты, умирить мир и спасти души наша.

Канон, глас 5.

Песнь 1

Ирмос: *Коня и всадника в море Чермное, сокрушай брани мышцею высокою, Христос истрясе, Израиля же спасе, победную песнь поюща.*

Слава Тебе, Боже наш, слава Тебе.

Агнче Божий, Слове, даждь нам слово,
недостойным Твоим рабом, да возможем
воспеть честное житие блаженныя Евфросинии
в память пренесения мощей ея.

Преподобная мати наша Евфросиние, моли Бога
о нас.

Преподобная мати, из младенчества прилежно
обучившись Божественному закону, сосуд была
еси Святаго Духа.

Слава: **П**реподобная мати, словесы
евангельскими напитавшись, мир оставила еси,
богатство и славу ни во чтоже вменивши, и всем
непрестанно вопияла еси: возлюбите Бога и
обрящете благодать вечную.

И ныне, Богородичен: **С**ветоносно возсия в
сердцах, Пренепорочная, верую чтущих Тя,
Божью Матерь, и озари день светоносный
Христос, от Тебе плоть приемый, Богоневесто.

Песнь 3

Ирмос: *Водрузивый на ничесомже землю
повелением Твоим и повесивый неодолимо
тяготеющую, на недвижимем, Христе, камени*

заповедей Твоих Церковь Твою утверди, Единая Блаженная и Человеколюбивая.

Христов глас услышавши, шествовала еси вслед Того заповедей, и отвергла еси попечения вся, и единая под сению святого храма Богу беседующи чистейше, премудрости и совета благодать прияла еси.

Млада сущи возрастом телесе, путь добродетели восприемши, сим безбедно шествовала еси, закону новому Спасову повинующися и живоносным повелением Евангелия последующи.

Слава: Душу твою связавши любовию Христовою, земная возненавидевши вся мудре, водворилася еси, мати преподобная, в предуказанную ти от Ангела и последи созданную тобою обитель Спаса.

И ныне, Богородичен: Солнца мысленного, Всенепорочная, селение была еси, Божественными светлостями нас благодатно озарившаго и мглу неразумия отгнавшаго, Приснодево.

Седален, глас 5:

Пресветлая и светоносная, преподобная мати Евфросиние, приспе твоя память, созывающа

верных множество прославити и пети твое честное пренесение. Тебе убо просим: моли Христа Бога даровати нам велию милость.

Слава, и ныне, Богородичен:

Поем Тя, Богоневесто, славяще рожденного Тобою Христа Бога нашего, Имже избавихомся от лести диавола и всякия беды, Богородице Владычице, и верою вопием: помилуй Церковь и стадо Твое, Едина Всепетая.

Песнь 4

Ирмос: *Божественное Твое разумев истощание, прозорливо Аввакум, Христе, со трепетом вопияше Тебе: во спасение людей Твоих спасти помазанья Твоя пришел еси.*

Видевши преподобная стадо божественных овец своих совокуплено во множестве, радовашеся им, яко своему спасению, и на всяк день учаше сестры своя.

Старья учила еси, преподобная, терпению и воздержанию; юныя же – душевной чистоте и безстрастию телесному, говению благообразну, ступанию кротку, гласу смиренну, слову благочинну, ядению и питию малу и безмолвну.

Слава: Научила еси, преподобная мати, юныя при старейших молчати, мудрейших послушати, к старейшим покорение, к меньшим любовь имети, мало вещати, более же разумети.

И ныне, Богородичен: Невместимый всеми, Пречистая, вмещается во утробу Твою, благостию спасая мя, погруженнаго во гресех.

Песнь 5

Ирмос: *Одейся светом яко ризою, к Тебе утренюю и Тебе зову: душу мою просвети омраченную, Христе, яко Един Благоутробен.*

Видевши себе преподобная в старости маститей, желанием возжелеле посетити град, идеже пострада Христос Спас наш, поклонитися и облобызати Живоносный Гроб Христов и тамо скончати житие свое.

Слышавше вси людие о отшествии блаженныя, исполнишася скорби велия, и вси с плачем прихождаху к ней и моляху ю, да не оставит чада своя сира.

Слава: Притек на отшествие твое, преподобная, возлюбленный брат твой с супругою и чады своими, рыдает горце и, припад к ногама твоима, глаголет: госпоже моя, мати и сестро,

почто оставляеши мя, свете очию моею и наставнице жизни моея.

И ныне, Богородичен: Низложи, Мати Божия, крепость всех врагов, обидящих ны, невредимо Твое стадо спасай от приражений римскаго неправоверия, яко да по долгу Тя ублажаем.

Песнь 6

Ирмос: *Неистовствующеся бурю душетленною, Владыко Христе, страстей море укроти и от тли возведи мя, яко Благоутробен.*

Видевши толикий плач о отшествии твоём, блаженная, сладостно утешаючи южики и духовная чада твоя, провещаваеши: не оставити хошу вы, но помолитися хошу о вас на месте страданий и преславнаго воскресения Христа Спаса моего.

Духом прозревши преподобная, яко дщери брата ея, юныя отроковицы Кириния и Ольга – сосуди суть избранныи Господеви, рече к ним пред отшествием своим: хошу вы обручити Жениху Безсмертному, яко да внидете в чертог Царствия Его.

Слава: Усладися отроковицам Киринии и Ользе беседа преподобныя, к нейже со умилением припадша, радостно рекоша: да будет воля

Господня, да устроит святая твоя молитва о нас, якоже хочещи. Святая же призва епископа, иже и введе Киринию и Ольгу во церковь Спаса, и тамо постриже я, и обручи Христу.

И ныне, Богородичен: Ты еси дверь Царя Небес и Храм славы Его, Дево Всепетая, отверзи нам двери милосердия и введи ны молитвами Твоими во обители Небесныя славы.

Кондак, глас 8:

Верую и любовь твою честное пренесение празднующе, молимся, блаженная: сохрани и соблюди нас от всякия злобы и еретическаго обольщения, имаши бо дерзновение ко Владыце всех – Христу Богу. Егоже моли спасти православныя люди, молящыя тя, да вси вопием ти: радуйся, Евфросиние, невесто Христова всечестная.

Икос:

Ангельски на земли житие совершила еси: чистотою и смирением, кротостию и терпением, милосердием и воздержанием Господеви угодила еси. И ныне во светлостех святых почивающи последи трудов твоих, приими от нас пение сие: радуйся, девственнице душею и телом; радуйся, наставнице предивная инокиням; радуйся, еще

на земли сподобльшаяся ангельскаго видения; радуйся, от Господа чрез Ангела устроити обитель повеление приимшая; радуйся, со тщанием волю Господню исполньшая; радуйся, вся земная наслаждения мира сего Христа ради отвергшая; радуйся, Небесному Жениху Иисусу Сладчайшему себе обручившая; радуйся, в чистоте, постех и молитвах Тому послужившая; радуйся, безценное сокровище, Пречестный Крест, обители твоей во освящение и утверждение стяжавшая; радуйся, во трудах дневных и ночных житие твое совершившая; радуйся, в невечернем дни Царствия Божия ныне пребывающая; радуйся, Евфросиние, невесто Христова всечестная.

Песнь 7

Ирмос: *Превозносимый отцев Господь пламень угаси, отроки ороси, согласно поющия: Боже, благословен еси.*

Вручивши обитель твою преподобней сестре твоей Евдокии, паче же Христу Богу, радостно востекла еси на предлежащий путь со князем Давидом и южикою Евпраксиною, купно с ними воспевающи: Боже, благословен еси.

Изыдоша провождати преподобную вси людие града Полотска. Стариини убо плакахуся о ней, яко

о сестре, рекуще: увы нам, подпоро старости нашея, просвещение душ наших! Юнии же глаголаху: камо уходиши, свете очей наших? Кто нашу юность укрепит? Не остави нас сирых, в молитвах твоих не забуди нас. Услышавше же, яко преподобная не оставити их хочет, но помолитися о них, со умилением вопияху: таковую молитвенницу нам даровавый, Боже, благословен еси.

Слава: Срете преподобная на пути благовернаго императора Царяграда Мануила, иже, слышав о желании сердца ея, даде ей спутники – воины, охраняти ю на пути в Царьград. Тамо же любовне прият ю патриарх Лука, и с нею во храме святыя Софии воспеваше: Боже, благословен еси.

И ныне, Богородичен: От девственных ложесн Твоих воплощься, Бог явися на спасение наше. Темже Тя Матерь ведуще, Богородице, правоверно вопием Ему: отец наших Боже, благословен еси.

Песнь 8

Ирмос: *Тебе, Вседетелю, в пещи отроцы всемирный лик сплетше, пояху: дела всякая Господа пойте и превозносите во вся веки.*

Купивши златую кадильницу и фимиамы, прииде преподобная во святыи град Иерусалим и со многим умилением просяше блаженнаго патриарха, да сотворит он ей милость и да отворит врата Гроба Христова. исполни убо патриарх прошение ея; святая же, пришедши ко вратом, падши на землю, с молитвою лобызаше я, радостно вопиющи: дела всякая Господа пойте и превозносите во вся веки.

Треми деньми приходяше преподобная во врата святая ко Гробу Спаса Христа, и, окадивши златую кадильницею Святыи Гроб и поставивши zde кадило со многими дарми, моляшеся к Жениху Христу: сподоби мя, Владыко, скончати на месте сем святем, приими дух мой во Святем граде сем и упокой мя на лоне Авраама, да со всеми угодившими Тебе воспеваю: дела всякая Господа пойте и превозносите во вся веки.

Слава: Услыша Господь, преподобная, моление твое и посла к тебе Ангела Своего, рекуща ти: блаженна ты еси в женах, и благословен труд твой; се уже отверсты двери райския, се уже собирашася и Ангели, держаще свечи, чающе твоего сретения. С теми убо и мы, недостойнии, о блаженнем успении преподобныя воспеваем:

дела всякая Господа пойте и превозносите во
вся веки.

И ныне, Богородичен: Образ носящи древле
рождества Твоего, Дево Мати, пещь разжженная
юноши невредимы сохрани, такожде и огонь
Божественный не попали утробы Твоея, Чистая.

Песнь 9

Ирмос: *Исаие, ликуй: Дева име во чреве и роди
Сына Еммануила, Бога же и человека, Восток
имя Ему; Егоже величающе, Деву ублажаем.*

Сродницы твои, преподобная мати Евфросиние,
оплакавшие твою честную кончину, омывшие и
опрятавшие честныя мощи твоя, погребоша тя со
святолепным пением во обители преподобнаго
Феодосия, возвращшися же во град Полотск,
возвестиша о блаженнем успении твоём князем
и людем и девам, собранным тобою во обители
твоей. Тии же, со умилением слезы источающе,
воздаша хвалу и благодарение Трисиянному
Богу и начаша праздновати память блаженнаго
успения твоего.

Видяще Российстии иноцы честныя обители
Пресвятыя Богородицы град Иерусалим обстоим
от поганых агарян, изнесоша честныя мощи
твоя во пресветлый град Киев и водвориша я во

обиталищи преподобных Антония и Феодосия Печерских чудотворцев, тамо Промыслом Божиим неврежденно и хранимы бяху до лет наших, во оправдание веры нашея, юже со Евфросиниею Полотская земля прият от князя Владимира.

Слава: Бог в Троице славимый, в Егоже руце сердце царево, внуши помазаннику Своему, благочестивейшему государю императору Николаю Александровичу, благий совет: призрети на моление и вопль Полотския страны, да водворит на место земных подвигов честныя мощи твоя, яже мы сретающе, псаломски вопием: да даст Господь державному правителю нашему по сердцу его и весь совет его исполнит, да укрепит Белорусскую землю в Православии, и да запнет злохитрым латином в лукавстве их, и молитвами преподобных да возвратит отторженныя коварством и насилием.

И ныне, Богородичен: Светом Твоего милосердия озари мя, во тьме неразумия лежащаго, Едина Светодавца рождшая, Избавителя и Бога, святыя венчавшаго.

Светилен, глас 8:

Равноангельно поживши на земли,
равноангельну обрела еси светлость, тех бо

боговиднаго сияния причастница была еси, с нимиже и радуешися всегда; предстоящи Престолу Святыя Троицы, присно молися о нас, верою и любовью совершающих празднество пренесения честных мощей твоих.

Слава, и ныне, Богородичен:

Щедроты Твоя, Боже, на люди Твоя низпосли, молитвами Пречистыя Твоея Матере и всех святых, и, предстательством преподобныя Твоея Евфросинии, даруй нам велию милость.

На хвалитех стихиры, глас 8:

Приидите, вернии, хвалами сошедшеся, ныне составим торжество в честном празднице чуднаго пренесения мощей преподобныя Евфросинии и, духовно празднующе, к ней возопиим: моли Христа Бога православному воинству нашему победы на безбожныя супостаты даровати, людем же крепкое противостояние иноверным подати, тебе бо ко Владыце теплу за ны молитвенницу и помощницу противу еретиков стяжахом, подающую православным утешение и велию милость.

Небеснаго Царя и Владыки Христа невеста была еси, преподобная Евфросиние, чистоту бо

соблюла еси, без неяже не узрит Бога никтоже. Того ради и воздаяние по достоянию прияла еси: честное бо тело твое, во гробе лежащее, цело и нетленно соблюдесе, душа же к небесным ликостоянием преиде. Темже Христу Жениху молися присно о всех, чтущих тя любовью и празднующих пренесение многоцелебных мощей твоих, низпослати мир и велию милость.

Подвигом добрым подвизалася еси, течение и веру соблюла еси, преблаженная мати Евфросиние, прочее же соблюдесе тебе венец правды, имже венча тя истинный Мздовоздаятель Христос. Того моли, преблаженная, спастися обители твоей и всем сыновом Белорусския земли, пришествие твое во град Полотск светло торжествующим.

Слава, глас 6:

Приидите, вси благовернии людие, сошедшесе празднуим пренесение мощей преподобныя Евфросинии: сия бо измлада покори плоть духу и по Господним стопам изволи ходити, на земли праведное житие показа, Ангелы удиви, демоны же устраши и человеки просвети. К ней убо мы ныне рцем: радуйся, мудрая управительнице во спасение; радуйся, две обители, яко свечи, возжегшая; радуйся, светом жития твоего

просветившая страну Полотскую; радуйся, бывшая во украшение пещер Киевских; радуйся, молением граждан полотских во удел твой возвратившаяся; радуйся, Евфросиние предивная, земный ангеле, ныне на небесех предстоящи у Престола всех Царя, Христа Спаса Жениха твоего, к Нему молися за Полотскую страну и за вся люди православныя, верою и любовью празднующия твое честное пренесение, во еже спастися им.

И ныне, Богородичен, глас тойже:

Богородице, Ты еси Лоза Истинная, возрастившая нам Плод Живота, Тебе молимся: молися, Владычице, со святыми апостолами помиловати души наша.

Славословие великое и отпуст.

На литургии

Блаженны от канона, песнь 3-я и 6-я.

Прокимен, глас 7: Честна пред Господем смерть преподобных Его. **Стих:** Что воздам Господеву о всех, яже воздаде ми?

Апостол к Галатам, зачало 213.

Евангелие от Матфея, зачало 10.

Причастен: В память вечную будет праведник.

*Печатается по изданию: Служба на пренесение
честных мощей преподобныя матере нашея
Евфросинии, игумении Полотския, от града Киева
во град Полотск. Полоцк, 2008.*